


surat popular

lao hamutuk




institutu ba analiza no monitor rekonstrusaun timor lorosae

ita nia minarai, ita nia futuru

Tansa minarai importante ba dezenvolvimentu
Timor Lorosae?

Timor Lorosae sai ona rai foun ida independente iha Maiu 2002. Maibe independensia politika nee tenki hetan tulun husi independensia ekonomika.



Independensia ekonomika Timor Lorosae depende ba osan husi ninia rekursu natural, liliu posu minarai iha Tasi Timor okos entre Timor Lorosae no Australia.



Oras nee, Governu Timor Lorosae hetan ona 13,8 tokon dolar americano husi pusu minarai sira. Maibe Governu Australia naok tiha ona 1,5 biliaun dolar americano husi posu minarai Timor Lorosae nian. Loron ida governu Australia naok 1 tokon dolar americanu husi Timor Lorosae. Osan hirak nee mos importante tebes ba futuru ita nia oan sira.

Tamba nee, ema Timor Lorosae hotu presiza hatene asuntu minarai no gas.

Governu Timor Lorosae bele uza osan hirak nee hodi hamenus kiak no hadia servisu iha setor edukasaun, saude, eletrisidade no buat seluk tan.



Posu minarai iha Tasi Timor nee iha neebe deit?

Governu Timor Lorosae reklama posu Buffalo, Laminaria-Corallina, Elang Kakatua, Bayu Undan, Troubador, no Greater Sunrise. Posu hirak nee boot. Maibe iha mos posu balu nebe kiik liu hanesan Jahal Kuda Tasi no sel-seluk tan. Tuir lei internasional, posu hirak nee Timor Lorosae nian.



Oinsa povu Timor Lorosae bele hatene no involve iha prosesu dezenvolvimentu industria gas no minarai Tasi Timor?

Tanba osan husi minarai no gas importante tebes ba dezenvolvimentu ekonomia Timor Lorosae, ema hotu presiza buka hatene no involve iha prosesu nee. Too ohin loron Australia explota hela posu minarai no gas hirak nee.



Governu Timor Lorosae hakarak tur ho governu Australia atu negoseia tasi ketan entre rai rua nee. Maibe Australia la iha hakarak atu koalia tuir lei internasional tanba hatene katak sira sei lakon posu minarai no gas hirak nee.

Ema hotu iha Timor Lorosae sei fo liman ba malu atu luta ba soberania ekonomika nasional rai nee. Povu Timor Lorosa'e presiza hatene lo-los informasaun kona ba prosesu negosiasaun entre Governu Timor Lorosae no Australia nunee mos prosesu dezenvolvimentu industria iha Tasi Timor. Informasaun seluk tan nebe importante mak buka hatene osan hira mak Governu Timor Lorosae hetan ona husi industria nee no uza ba saida.



Pergunta ba diskusaun

Diskute perguntas hirak nee hamutuk ho kolegas, vijinus, familias, mestres, chefe aldeia no ema seluk tan....



- ✓ Oinsa ita boot nia haree kona ba uza osan husi minarai ba dezvoltimentu?
- ✓ Iha ka lae riku soin balu iha rai laran nebe bele halo osan atu nunee ita la depende liu ba osan husi minarai no gas? Karik iha, saida deit?
- ✓ Oinsa ita boot bele involve iha prosesu dezvoltimentu minarai no gas iha Tasi Timor?
- ✓ Oinsa ita boot haree kona ba governu Australia nebe oras nee okupa no nauk minarai no gas iha Tasi Timor?